

Erich Bolinius
www.erichbolinius.de

(Bericht über den BSV Kickers Emden

Sendung „Flutlicht“ auf Radio Ostfriesland

Donnerstag, 5.3.2014 18.00 Uhr auf 94.0 bzw. 87,7)

Moin, leev Toehörers,

siet Jahren geev ik hier elke Week um kört na Klock seß 'n Spölbericht van dat lesd Kickersspöl up Platt.

Nu hett man mi van de Redaktion van disse Sendung beden, na Spölen van Kickers Emden in dat Oostfreesland-Stadion, also wenn Kickers to Huus spölt, keen detaillierte Bericht mehr to geven, wall dat Spöl in de „Pressekonferenz“ genau analyseert word, un wat dor seggt worden is, ok in disse Sendung, un zwar van Gerd Krauledat, brocht word. Ik sull na Spölen in Huus dorum bietje mehr van de anner oostfreeske Mannskuppen in de Landesliga Weser-Eems, dat sünd Germania Leer, TuS Pesem (Pewsum) un TV Bunn (Bunde) vertellen. Goed, na 'n Settje Overleggen, of ik dat so maken sull of heel mit disse Berichten uphören sull, hebb ik mi entsloten, dat so toe maken. Geiht mi dat doch ok dorum, dat de plattdüütske Spraak neet unnergahn sall.

Dorum doe ik hier vandaag blot seggen, dat Kickers Emden lesd Sönndag tegen TuS Emstekerfeld in de Landesliga mit 4:3 wunnen hett. Wi wassen uns up de Tribüne eenig, tegen mi satt de langjährike Trainerin van Kickers Emden Damenmannskupp, Karin Andersson, dat dat 'n heel glückelke Sieg för Kickers was.

Aber wat sall't, wunnen is wunnen. Un Kickers kann de drie Punkten goed bruken.

Nadem de A-Joegdmannskupp van Kickers Emden dat Spöl toe Huus tegen JFV Nordhorn al mit 0:8 verloren harr, verlor de Mannskupp dit Maal mit 1:9. För de Jungs is disse Klasse eenfach toe hoog. Man de Spölers könt ok dorut lernen. Hopentlik hollen de Jungs dör un spölen de Saison toe Enn. Wenn neet, mutt de Mannskupp in de komende Jahr heel unnern in de Kreisklasse weer anfangen. Un dat was för 'n Vereen van Kickers Emden neet goed.

Nu toe de drie anner oostfreeske Mannskuppen in der Landesliga.

TuS Pesem (Pewsum) wunn, för mi heel überraschend, tegen SV Holthausen-Biene up egen Platz mit 4:0.

All Toren fullen eerst in de 2. Halvtied – ok dör Spölers, de fröher al maal bi Kickers Emden spölt hebben, so twee Toren dör Bygus, un jeweils een Tor dör Kraztalla un Geiken. Trainer Stefan Prause, de na de Saison van de ehemalige Kickerstrainer Yasin Turan oflöst word, was heel besünners mit de 2. Halvtied best toefree un meente, dat dat wunnen Spöl hoogverdeent was.

TV Bunn (Bunde), de lesd Week dat eerst Maal tegen de 2. Mannskupp van VFB Oldenbürg wunnen harr, verlor tegen de Tabellenführer Spelle-Venhuus na 'n heel goed Spöl mit 0:1. Ja, dat is so, wenn man unnern in de Tabell steiht, dat fehlt meistens ok dat Glück.

Germania Leer spölte Dingsdagabend tegen BW Lohne un verlor dat Spöl toe Huus mit 1:3. Dör 'n Elfmeter was Lohne al in de 5. Menüte in Föhren gahn. Appeldorn skoot wall in de 58. Menüte de Utglick, man Lohne skoot dorna noch 2 Toren. Leers Trainer Pastorek meente na dat Spöl, dat man weer maal na de groot Insatz neet belohnt worden was.

Sönndag mutt Kickers Emden nu na Germania Leer. Dat word seker 'n heel heet Derby.

Freien wi uns all up 'n moi Spöl. Natürelk hoopt de Mannskupp van Kickers Emden, dat 'n Bült Emder Fans de Weg na Leer finnen un dat se ok winnen. Ofwall dat Spöl lesd Sönndag

van Kickers neet goed was, tipp ik up 2:1 Sieg van Kickers. Ok wall in de Achtermannskupp Manuel Menzel weer dorbi is. De bringt na mien Menen mehr Sekerheid.

So, toe Schluss noch 'n Foetballsprök van Dieter Eilts van Werder Bremen, de ehemalige oostfreeske Nationalspöler, up 'n Fraag van 'n Reporter:
„Dat interessert mi as 'n een geplatzte Currywurst in oostfreeske Wattenmeer.“

So, leev Toehörers van Radio Oostfreesland,
ik hoop, Joe hett dat Plattdüütsk gefallen, denn mien Motto heet ja alltied,
plattdüütsk dürt - nettso as Kickers Emden – neet unnergahn.

Bit anner Maal

Joe

Erich Bolinius ut Emden-Petjem.

.